



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 7

Barcelona nungi asayar Gavi
ita 5 shi masayatettsü

NATO teyari nung Ukraine-i tesem
balala meyipa agitettsü: Trump



VOL. XXII ISSUE NO. 342 (ADOK 342) DIMAPUR YANGTEPNÜ (THURSDAY) RONGJUI (SEPTEMBER) 25, 2025 ₹ 5.00

CoRRP-i 'Job Reservation Commission' nüngja melentsü ashir

Dimapur, September 24, 2025 (TYO): Nagaland sorkari Reservation Commission June 3 senden nung tentetba sangdong nung agüja aliba onük kar memetongshira September 30 sülen lungkak aittsü ta Kin 5 agi tentetba Committee on Review of Reservation Policy (CoRRP)-i metetdaksüogo.

Nagaland sorkari September 22, 2025 nü Commission tentetba tera pelaa agizüker saka iba nüngja nung temulung masür. Sorkari agütsüba sangdong nung "Job Reservation Commission" ta shia lir aser iba ya June 3 nü sorkar den angatettepba aser ano Cabinet-i August 6 nü "Reservation Review Commission" indang sangdong

agütsüba den meputep, ta CoRRP-i ashi. June 3 senden nung jembitepba ama sorkari 'Reservation Review Commission' ta nüngja melentsüla aser iba ajanga 'reservations in jobs' aser 'reservation in technical and professional seats' anaprong sendakteptsü aser meyipa reprangshitsüla ta CoRRP-isa metetdaksüogo.

Cabinet-i June 12 nü tentettsü mulunga agizükba sülen anogo 100 tema süir ang Commission tentetogo. Sorkari iba ya memetongshira September 30 sülen lungkak aittsü ta September 20 nü bangzüngtepa aliba ama inyaksü ta parnokisa ashi.

Ladakh statehood meshia lungkak aitdang 4 asü

Leh, September 24, 2025 (Agencies): Bodbarnü Ladakh yimtiba Leh nung statehood meshia lungkak aitba sentong tulu ka agidang nisung pezü taküm sama aser 50 tema yirua lir.

Lanur kari BJP aser Hill Council headquarters nung lung agi ona lungkak aitba ajanga tensa mejungi aküm. Idangji police aser paramilitary forces-i telok azüoktsü atema teargas shells amshitsüsa aküm ta osang angazüker.

Lungkak aitersemi Ladakh atema statehood meshir aser

Centre den Sixth Schedule atema olemtep alitsü akhanger.

LAB nung lanur kongsangi September 10 nungi anogo 35 lumia lungkak aiter. Iba sentong nung adener nisung 15 nungi ana mozü kidangi anir aotsüsa aküm aser iba jagi tanü lanurtemi lungkak aittsü aser mokdangtsü ayongzüker ta angazüker.

Statehood mangu tashi aser Sixth Schedule kübok Ladakh medendaktsü tashi lumia lungkak aitba manentsü ta Leh Apex Body (LAB)-i sangoktsüba sülen anogo ishika lir iba ya atalokogo.

Dr. Rosemary Dzuovichu amokmerenba aitsür: NPF

Dimapur, September 24, 2025 (TYO): Nagaland nung tetsürtem tanishir aser Naga Mothers' Association (NMA) Adviser Dr. Rosemary Dzuovichu tepsettsü amokmerenba aser

mezüngmeshiba khukhua aitsür ta Naga People's Front (NPF)-i metetdaksü. Dr. Dzuovichu tepsettsü amokmerenba aser online nung la mezüngmeshiba ya Naga tsürtem sensamasatsüba aser democratic tamendakdak anema lir. Iba inyakyim ya Indian Penal

Code aser Information Technology Act kübok ozüng alema inyakba mapa ka ta Press Bureau, NPF Central HQ: Kohima-i sangdong ka nung ashi.

NPF-isa state sorkar, ozüng amertem aser Cyber Crime Police dang tekaratiba nung iba posts asürtem bushitsü, FIR ka benoktsü aser aibelenertem ozüng kübok merenshitsü ayongzüker.

"Onoki Dr. Rosemary Dzuovichu aser Naga Mothers' Association den külemi noktaker" ta NPF-isa ashi.

Showuba nungi Ghotovi village lenmang atema metetdaksür

Dimapur, September 24, 2025 (TYO): Niuland district kübok Showuba nungi Ghotovi village tashi 2-lane road yanglutsü aliba atema Niuland district administration-i sangdong ka agütsüogo.

Showuba nungi Ghotovi village (Showuba den Guzunu-Pughoboto-Noklak-Pangsha sendaktepba) lenmang anatsülen

area administrative officers dang nungi temelaba meshir ang kiojen yanglutsü melar ta Niuland Deputy Commissioner Sara S Jamir-i ashi.

Iba lenmang anatsülen uninhabited area nung Right of Way dimension 18 m in built up/ habitat aser 24 m atema temenok kecha magütsütsü ta Niuland Deputy Commissioner-isa metetdaksü.

Sorkar mapa inyakertemi IAS induction policy anema lungkak aiter

Dimapur, September 24, 2025 (TYO): State sorkari non-SCS officers nungi IAS nung aniokba anema Confederation of All Nagaland State Service Employees' Association (CANSSEA)-i asüng nungi lungkak aittsü.

September 25, 2025 nungi tenzüka Kohima nung aliba affiliated associations nung mapa inyakertemi tejashiba sayua ribbon mesüra badge tanak enoktsü.

State sorkari March 10, 2025 nü Advertisement Circular nung

aliba ama masü Non-SCS officers Screening asüba anema iba mapa ya inyaksü ta CANSSEA-i sangdong ka nung metetdaksüogo.

Züngsem ajaki lungkak aitba ajanga ketdangsübaren nung timtem magütsütsüsa shilem agütsü nenshia metetdaksür. Züngsemtemi inyakyim sülen anidaktsüla, tashi angatsüla aser mapai shitak aotsüla ta CANSSEA ketdangpurtemi ashi.

Core Committee aser Action Committee ajanga tarutsü nung

lungkak aittsüba asadanger osang metetdaksü ta ketdangpurtemisa metetdaksüogo.

Iba sangdong nung Core Committee Secretary Dr. Ndangkie Ndang, Action Committee Convenor Yhunsenlo Kent, CANSSEA President Zubemo Lotha Tsanglao, FONSESA President Er. Fineson Pojar, NF&ASA President Amenla Jamir, NIDA President Dr. Thomas Keppen aser NSSA President Chubasangla Longkumer nungeri sign süa lir.

Lisopur masür nem PRCs tagütsü: NSF

Dimapur, September 24, 2025 (TYO): Inner Line Regulation Commission (ILRC), Naga Students' Federation-i Nagaland nung village council aser gaon burah tem dang parnok telongtet nung aliba non-indigenous nisungtem nem permanent resident certificates (PRCs) magütsütsü ayongzüker.

Lisopur masür nem PRCs agütsütsün memelar aser iba ya Inner Line Pass (ILP) system anema lir ta ILRC-i ashi.

Nagaland nung village council aser gaon bura temi

temporary resident certificates (TRCs) agütsübabo kecha masü saka yimtsüng kar nung ketdangpurtemi lisopur masür nem PRC agütsüba kulitem onoki nguogo aser iba ya anentsüla ta ILRC-isa metetdaksü.

Külen, nisung kari ILP reprangba tenüng amer non-locals nem timtem agütsüba osangtem angazüker. Ajisüaka kija mesüra telok kecha nem-a iba mapa inyaksü tashi agüja mali ta parnokisa metetdaksü.

"State sorkari ILP mapa tajungba inyaksü atema

landowner-tenant registration App sayaba atema pelar aser tenüsang agütsür. Iba ya taoba mapang onoki chief secretary den landlord-tenant registration system ka alitsü ashiba den putepa lir" ta ILRC-isa ashi.

NSF kübok federating units ajaki pei pei district/telongtet nung ki kiburtem dang non-local aliba osang agütsütsü ajungmesotsü tetuyuba agütsür. Iba App ya <https://police.government.gov.in> nung angutsü ta ILRC-isa metetdaksüogo.

Nagaland nung Swasth Nari Sashakt Parivar Abhiyaan takok ngua agir



Dimapur, September 24, 2025 (TYO): Nagaland nung Swasth Nari Sashakt Parivar Abhiyaan nung tetsürtem, aiürtem aser tanurtem aika special health camps nungi tajangzüker agia arudar.

Linük ajungalen agiba sentong ya Prime Minister Narendra Modi-i September 17, 2025 nü tenzüksü. Iba campaign ajanga tetsürtem, mashisa alirtem, aiürtem aser tanurtem health aser nutrition tajungba kümdaktsütsü nükjidong lir.

September 24, 2025 nü Peren

district kübok AHWC Pelhang SC-i Government Middle School, Pelhang nung campaign ayonga agi. Idakji nisung 25 nem health check agia liasü aser menstrual hygiene & anaemia indang awareness talk liasü. Iba sentong nungsa TB screening asüba den sanitary pads aser Ayush IEC materials lema agütsü.

Mokokchung district kübok Sakhabama HWC nung SNSPA health camp ayongzüka agi. Iba sentong nung MO Kezocha PHC Dr Vekholu Venyo aser Senior Resident, Department,

NIMSR Dr Angvito Zhimoni nati anir medical team kati yaritep.

Zunheboto district nunga RBSK aser MMU team ajanga GHS Shovishe Memorial School, Zunheboto nung health camp ayonga agi.

Phek district kübok Leshemi SC-HWC nung camp agidang nisung 25 tashi health check-up asü.

Bodbarnü Sechu-Zubza PHC nung MO in-charge Dr Petekuolie Yhome aser Obstetrics and Gynae, Vishwema CHC Dr Ayo Thao nati anir telok kati special camp ka agiogo.

Swasth Nari Sashakt Parivar Abhiyaan kübok Homeland village (Niuland), Hukphang SC, Yongam SC (Peren district), Pongching SC (Longleng district), Good Shepherd High School (Kiphire district), Chekiye, PHC Singrijan (Chumoukedima), K Khuno (Phek district), Likhimro, UPHC Seikhazou, Vidima HWC, Longkhim (Tuensang), Lozatephe (Phek) aser Mima HWC, Rusoma HWC & Mewi School (Kohima district) nung special camps ayonga agiogo.

Niuland DPDB senden amen, school aser yimtsüngtem semdangtsü



Deputy Commissioner & Vice Chairman DPDB Niuland, Sara S Jamir lenisüba nung DPDB senden aliba noksa nung angur.

Dimapur, Rongjui/Sept. 24 (TYO): Niuland District Planning & Development Board (DPDB) senden September 24, 2025 nü Deputy Commissioner, Niuland indang Conference Hall nung mena lasü.

Iba senden nung Deputy Commissioner & Vice Chairman DPDB Niuland, Sara S Jamir menden lasü aser Minister, PHED & Cooperation, Jacob Zhimomi totuyuba nung DPDB züngsem temi district nung projects balala inyakba jangjatsü asoshi October ita mezüng hopta nung school aser yimtsüng tem semdangtsü, ta

metetdaksü aser züngsem ajunga iba inyakyim nung shilem agitsü asoshi renema alitsü ayongzüka lasü.

District kübok aliba yimtsüng 103 nung VCCs, GBs aser VDBs atema seminar ayongzüksü iba senden nung telemteba agi aser terenlok inyakba department ajunga dang PowerPoint presentation renemtsü Deputy Commissioner-i ashi.

Nüburtem nem VCCs, GBs aser VDBs inyakyim angatetdaksütsü aser yimtsüng balala nung state aser central sorkar indang scheme aser projects tem mapa kuma

inyakba indang shisa lemsateptsü nükjidong nung iba seminar ya ayongzüksü.

DC ajangasa department ketdangsürtem dang iba senton ajunga indang noksa nung GPS tagging asütsü nenshia ashi.

Cooperation Department nungi Dy. Registrar Cooperation Societies, Niuland, Bisinle Kemp-i iba senden nung par department inyakyim indang PowerPoint presentation agütsü aser taruba DPDB senden nung Fishery Department dang PowerPoint presentation renema bener arua agütsütsü nunglokja senden tembang.

Dimapur nung Mega Painting & Art Workshop ayongzüksü

Dimapur, Rongjui/Sept. 24 (TYO): North East Zone Cultural Centre (NEZCC), Dimapur ajanga Department of Art and Culture, Government of Nagaland den lungiemer "Seva Parv - Vision of Viksit Bharat ke Rang Kala ke Sang" omen kübok painting aser art indang workshop ka ayongzüksü renema lir.

Iba workshop ya September 30, 2025 anüngdang 11:00 ako nungi tenzüka NEZCC Stone Sculpture Garden, Dimapur nung ayongzüksü, koba art

ajanga 'developed India' indang mangdang benjongsü nükjidong nung ayongzüksü.

Iba sentong nung professional artists, college students aser school students temi shilem agitsü akok.

Iba sentong nungya telok asem lemsar tetoktepba alitsü, kong professional artists tem nungi mezüng jenjang angur nem sen 1,00,000, tanabuba jenjang angur nem sen 50,000 aser tasembuba jenjang angur nem sen 25,000 agütsütsü.

College students atema sempet ya sen 25,000, sen 15,000 aser 10,000 alitsü. School students atema mezüng jenjang nem sen 10,000, tanabuba jenjang nem sen 5,000 aser tasembuba jenjang nem sen 2,500 den consolation prizes agütsütsü.

Iba tetoktepba atema entry fee malitsü aser tenüng zülüoktsü atema 7627955592 (WhatsApp only) aser nodalofficernezcc@gmail.com ajanga tongteprateptsü akok.

Chiyungtsü aser osettsüset tapu balala ayokdak dokan ka lapok



Mokokchung DC, Ajit Kumar Verma IAS-i "La Ketmung Store" lapoktsür külen, külem ketdangsürtem den Mokokchung Sr. SP, Vesupra Kezo aser department kar nungi tulurtem densema noksa nung angur. Mokokchung, 24th September, 2025

Mokokchung, 24th Sept (TYO): Tetsürtemi chiyungtsü mesüra nüngdakba osettsüset tapu balala yanglur tayokdak maka shisa bulua alirtem kar lira, item pur asoshi jangratemtsü osang tajung kaji Mokokchung Urban Oasis Supermart anasa "La Ketmung Store" ta sür dokan ka 24th Sept nü Mokokchung

Commissioner, Ajit Kumar Verma, IAS-i meraketa lapoktsüogo.

Iba dokan ya tongtibangsa Mokokchung district kübok aliba Self Help Group (SHG), kija aser tetsür telok balala shirnoki pei tepok sünga alitsü asoshi mapa tapu balala inyaker, parnok jenjang ajungkettsütsü asoshi lapokba maparen ka lir.

Iba dokan ya Centre for Cooperative and Livelihood (CCL), LBSNAA-i senotsü teyari agütsür SANKALP – District Hubs for Empowerment of Women (Mission Shakti) Mokokchung-i achayangtsüba mapa ka lir.

La Ketmung Store nung ya tetsür kija aser telok balalai tayoktsü asoshi yangluba chiyungtsü aser nungdakba osettsüset (products) yoktettsü. Anungji, tetsür kija aser telok kar danga pei-i yanglubatem tayoktsü tebilemstü ka-a lira, parnok asoshi ibai maongka tajung asütsü, anungji, marendaki arua yangi tongteprateptsü akok. Iba dokan ya taruba hopta nungi dang kanga junga tenzüka aotsü, ta ketdangsüri osangbener den jembidang metetdaksü. Iba dokan meshiteta Moatoshi Longkumer-i meshitetsü.

Iba dokan nung lon (pickle) tapu balala, chips, nanglong (candy) balala, doormat, azük, sabun, liso mozü aser ano nüngdakba osettsüset tapu balala angutsü.

Dimapur nung pensioner physical verification agitsü

Dimapur, Rongjui/Sept. 24 (TYO): Office of the Senior Treasury Officer, Dimapur ajanga sangdong ka nung, 2025 küm atema pensioner Annual Physical Verification sentong October 13, 2025 nungi November 7, 2025 tashi agitsü, ta metetdaksüogo.

Küm shia pension agütsüba maparen tajungba nung inyaksü asoshi Dimapur Treasury kübok iba verification ya pensioner ajunga atema alitsü.

Pension serial numbers nung ajemdaker pensioner temi anogo latetja aliba nung arua verify asütsüla. October 13 nungi tenzüka family pensioners aser life pensioners anogo balala nung verify asütsü aser anogoshia pensioner 500 tashi verify asütsü.

Temang manem aliba pensioner tem October 29-30, 2025 anogotem repringtsü, arishi küm 75 nungi tema pensioner tem November 3-7, 2025 anogotem aser absentees

atema October 28 aser October 31, 2025 grace periods lemszüksür, ta sangdong ajanga ashi.

Verification mapang Gazertted Officer-i meyongnem agüja aliba Life Certificate Form, PPO Book, Aadhaar Card photocopy, current branch Bank passbook (front page) photocopy, ita trok tsüngta tangokba passport-size noksa ka bener arutsüla.

Life Certificate Form ya Treasury Office nungi office mapang meshitetsü mesüra official website <https://treasuries.nagaland.gov.in/download?type=pension> nungi download sütetstü.

April 1, 2025 sülen mezüng payment agütsür aliba pensioner tem iba verification process nung madentsü.

Anungji pensioner ajunga anogo züngzüka aliba ama verification nung adentsü ayongzüker, ta Senior Treasury Officer, Dimapur ajangasa metetdaksü.

Dimapur nung ROJB launching workshop tembangogo

Dimapur, Rongjui/Sept. 24 (TYO): Nagaland Forest Management Project ajanga anogo ana atema Hotel Acacia, Dimapur nung ayongzüka Resource Organization on Jhum and Biodiversity (ROJB) launching workshop September 24, 2025 nü tembangogo.

"Northeastern Regional Workshop on Jhum Management and Ecological Stewardship" omen kübok ayongzüka iba sentong nung mongintem, ketdangsür aser stakeholders tem dena tekong lu ayimba mesamadaksütsü, libajen wazüka ayutsü aser Nagaland nung nüburtem poksünga alitsü indang jembia lasü.

Livelihood Expert, ROJB, Dr. Aosanen Ao ajanga iba workshop indang tongmelang agi rajema jembidang tongtipang onüktem jembiba aser tekong lu ketdangsütsü asoshi mera

agitsü aser biodiversity wazüka ayutsü indang lemsatepa lasü.

Principal Chief Conservator of Forests (PCCF) & Chief Wildlife Warden, Nagaland, Vedpal Singh, IFS ajanga tekong lu atema sentong yanglutsü asoshi kuli tejanga nung ajemdaker research agia amshitsü nüngdaker ta ashi.

Pai ROJB dang 'meta-analysis' agitsü aser sentong yanglurtem puatsüsa research agitsü ayongzüka lasü.

Singh-isa lokti tentet tem dang ali nung temelenshi tajung adokdaksütsü asoshi nükjidong tejanga aser tajung ayutsü ajungshia lasü.

Iba sentong nung Community Mobilization Expert, ROJB, Dr. Imnuksungla Pongen menden lasü aser CEO, ROJB, Dr. Prabhat Kumar, IFS ajanga melepzüng o jembia sentong tembang.

Mokokchung nung SNSPA campaign tenzüka lir



Dimapur, Rongjui/Sept. 24 (TYO): India tesem ajunga nung tetsür aser tanurtem Health & Nutrition tajungba kumdaksütsü nükjidong nung Swasth Nari Sashakt Parivar Abhiyaan (SNSPA) den lungiemer Mokokchung nung September 17, 2025 nungi October 2, 2025 tashi atema Health Campaign ka tenzüka lir.

Iba sentong yagi kibong tashi ita alitsü aser linük tajungba kumdaksütsü asoshi tetsür tem anema alitsüba indang sayur.

Department of Health & Family Welfare, Mokokchung ajanga tanü tashi district nung aliba health units 36 nung Swasth Nari Sashakt Parivar Abhiyaan campaign agia arur

aser October 2, 2025 tashi agitsü sentong lir.

Iba campaign mapang NCDs, Oral health/Dental services, ENT, Eye, paediatric, Maternal & Child health, Ayurveda, Immunization services den awareness balala agüja arur.

SNSPA campaign den külemi District RBSK Team ajanga Swasth Nari Sashakt Parivar Abhiyaan campaign nung shilem ka ama Government Schools aser Anganwadi Centres tem nung screening drive agia arur.

Iba campaign mapang nüburtem anidenba aser shiranger yariba nung ASHAs aser AWWs temi tongti shilem agia arur.

Leh nung longkak aitdang nisung pezü asü aser 70 yiru



September 24, 2025 nü Leh nung longkak aitdang tangokba noksa nung angur.

Leh, Rongjui/September 24 (Agencies): Bodhbarnü Leh nung lanurtemi Lakdakh atema state jenjang aser linük temzüng kübok Sixth Schedule nung züngoktsü atema takhangba agüja longkak aitba mapang nung nisung pezü asü aser nisung 70 dak tali yiruogo.

Osangbener den jembidang Leh Apex Body nung Chairman, Chering Dorjey-i, jila nung sepaitemi injang sashia khadokba mapang nung nisung jenti yiruogo aser tang tashi nung nisung pezübo süadokogo, ta metetdaksü.

Leh Apex Body (LAB) youth wing-i ayongzüka lumia longkak aitba mapang nung nisung ana temang kanga mejungi küma hospital-i anir aoba sülen longkak sashia ait tenzü.

Climate activist Sonam Wangchuk-i September 10 nungi tenzüka anogo aika lumia longkak aitba sülen Mongolbarnü tembangogo.

Longkak aitertem kari lung onloktsüba agi police-i tashiyim amshitsüsa aküm.

Ketdangsertemi ashiba agi, longkak aitertem jagi Leh nung aliba Bharatiya Janata Party (BJP) office rongdoktsü aser kima aliba sepai gari ka rongdokja liasü. Iba sülen lokti senshidaksütsü atema police-i teargas aser ajok amshitsüsa aküm.

Tensa azüoktsü atema Union Territory administration-i longkak aitba nokdang aser curfew ozüing benoka liasü. Anogo ananü Ladakh Festival amongba mapang nung lanurtemi longkak aitba ajanga iba sentong thina liasü.

Sonam Wangchuk-i longkak aitertem dang, "Ni lanurtem dang kiojen rongdoktsüba aser raraba anentsü mepishir. Onoki lumia longkak aitba anener anungji ni administration danga tear gas mamshitsü mepishir," ta metetdaksü.

Leh nung yimtenren lenir kati, "Tesüiba küm aika Ladakh nung nüburtemi tesünep nung item takhangba agüja arur. Ajisüaka tawa tensa majungba ya sorkari takhangba melangzüba agi lir," ta metetdaksü.

Ano külen tanga osang ka nung, Ladakh nung longkak aitba atema BJP-i Congress councillor Phuntsog Stanzin Tsepag aitsüogo.

BJP IT Cell tongti, Amit Malviya-i X ajanga, tang Ladakh nung tensa raksaba ama ya Congress lenir Rahul Gandhi-i aginüa liasü asü?, ta asüingdang.

"Ladakh nung rara adokdaksüsangji Upper Leh ward nungi Congress councillor Phuntsog Stanzin Tsepag lir. Pai lokti ajungmeso aser BJP office den Hill Council anema inyakba nung pai shilem agi. Rahul Gandhi-i iba ama tensa ya aginüa liasü asü?" ta Malviya-i ashi.

EC-i Rajya Sabha menden 5 atema by election agitsü anogo sangdong

New Delhi, September 24 (Agencies): Bodhbarnü Election Commission of India (ECI)-i Jammu & Kashmir nung Rajya Sabha menden pezü aser Punjab nung Rajya Sabha menden ka atema by election agitsü anogo sangdongogo.

October 24 nü menden ponguprongla atema election agitsü aser kasa anogo nungjisa vote zünga osang metetdaksütsü.

Jammu & Kashmir nung Rajya Sabha menden pezüprongla ya 2021 küm February ita nung azüngteta liasü. Ghulam Nabi Azad, Mir

Mohammad Fayaz, Shamsheer Singh aser Nazir Ahmed Laway nunger kümsük atongba agi item menden azüngtetja liasü.

Election Commission-i, J&K nung menden pezü atemaji election temeja asem agitsü, kechiyong mapang balala nung menden pezüprongla azüngteta liasü, ta metetdaksü.

Punjab nunga taküm July 1 nü Aam Aadmi Party (AAP) nungi Rajya Sabha MP, Sanjeev Arora-i kümsük mabensadang menden azüngtettsüba ajanga by election agitsüsa akümer.

Shidakba agibo pa kümsükji 2028 küm April 9 nü ang

abensatsü liasü.

Menden ponguprongla atema October 6 nü sangdong agütsütsü aser election nung tokteptsü atema tenüing agütsütsü asoshi tatembangbuba anogoji October 13 asütsü.

October 14 nü nominations reprangshitsü aser tenüing agientsü atema tatembangbuba anogoji October 16 asütsü, ta EC-i metetdaksü.

October 24 nü anepdang 9:00 ako nungi nikongdang 4:00 ako tashi election agitsü aser kasa anogo nungsa nikongdang 5:00 ako nungi vote azüngtsü.



September 24, 2025 nü Patna nung Congress Working Committee (CWC) senden nung party Tir Mallikarjun Kharge, Lok Sabha nung opposition lenir Rahul Gandhi, party lenirtem- KC Venugopal aser Ajay Maken nunger den tangartem tangokba noksa nung angur.

Pakistan-i par linük telung tebilemtsü atema inyaktsüla: India

New Delhi, September 24 (Agencies): Mongolbarnü United Nations Human Rights Council (UNHRC) senden nung India-i, Pakistan kübok Khyber Pakhtunkhwa province nung airstrike ajanga civilian 10 densema nisung 24 tepsetba aitsü.

India ketdangser, Kshitij Tyagi-i, Pakistan-i India anema inyaktsü melenbo par linük telung tebilemtsü onüktem atema inyaktsüla, ta ashi.

Geneva nung aliba India Permanent Mission nung councilor, Tyagi-isa, "Onok meyong litsü agitsü merangtsü melenbo parnoki ozüing alema atsünga agia aliba India litsü toktsütsüla. Kiralongra prokba, UN-i kiralongrar ta sangdonga alirtem kümsüka ayuba aser pei nüburtem bomb amshia amakba nungi mapang angudang par

linük nung rongsenkettzüing jenjang kümsütsü aser meimchir temeden wazüka ayutsü atema inyaktsüla," ta ashi.

Hombar aonung Pakistan Air Force (AIF)-i anünglen nungi Khyber Pakhtunkhwa amak. Mapang talangka nungi Tirah Valley ya Tehrik-e-Taliban Pakistan (TTP), Islamic State Khorasan Province (ISKP), Lashkar-e-Islam aser al-Qaeda-linked cells densema telungpur telok balala jenoka aliba tesem ka lir.

Tang tashi nungbo Pakistan air force aser sorkar napronglai shirnok amaktsü nükjidong nung amakar official sangdong kecha magütsü.

Human Rights Commission of Pakistan-i iba tatalokba aitsüba den külemi iba tatalokba bushisüingdangtsü atema takhangba agütsüogo.



September 24, 2025 nü Chandigarh Air Force Station (AFS) nung 'MiG-21 Operational Flying Culmination Ceremony' atema renemshidang tangokba noksa nung angur. Küm 60 dak tali MiG-21 raraba tayimtsü amshia aruba sülen item tayimtsü amshiba anenba sentong ya September 26, 2025 nü agitsü.

Maoists den raratsü atema J&K nungi CRPF sepaitem anitettsü

New Delhi, September 24 (Agencies): Union Home ministry-i CRPF nung tongti ketdangsertem dang Jammu & Kashmir nungi CRPF battalion aika aniteta Chhattisgarh, Odisha, Andhra Pradesh aser Jharkhand state tem nung Maoists telungpurtem raratsü atema yoktsü tuyuogo, ta osang ka ajanga metetdaksü.

Home ministry nung tongti ketdangser kati, tawa senden ka amenba mapang nung security ketdangsertemi Maoists telungpurtem den longjemer raratsü atema asalentong ka benoka liasü; iba nungji ajemdaker Jammu & Kashmir nung Amarnath Yatra atema Jammu & Kashmir nung lemzüka aliba CRPF sepaitem aniteter Maoists telungpurtemi timtem agütsüba state temi yoktsü atema telemtetba agi.

"Battalions tali yoksema ajanga Maoist-i timtem agütsüba state tem nung sepaitemi longjemer raratetsü; item state tem rongnung Chhattisgarh, Jharkhand, Andhra Pradesh aser Odisha densema lir. Telungpurtem mita aoba mapang nung state arrtsü adena aoba nokdangtsü atema

sepai tali nüngdaker," ta ketdangserisa metetdaksü.

"Iba asalentong kübok security sepaitemi longjemer Chhattisgarh state nung aliba aremtem nung Maoists telungpurtem sebangtsü. Ibaji ajanga Maoists telungpurtemi kidanger state tem- Odisha, Jharkhand aser Maharashtra-i jena moutettsü," ta CRPF ketdangser kati metetdaksü.

State tem tsüingda arrtsüleni jena aoba nokdangtsü nükjidong nung sepaitemi longjemer raratsü atema telemtetba agi, ta paisa shisem.

Mapang shia Union Home Minister Amit Shah-i, 2026 küm March 31 anogo tashi nungbo Maoists telungpurtem meshimeshia samatsütsü, ta sangdonger.

Tribal yimtsüngtem aser kanga tezülen aliba tesemtem nung terenlok mapa inyakba tsütsü Maoists-i timtem agütsür, aser ibaji ajanga item yimtsüngtem nung shisaliok, healthcare, tesendaktep lenmang, banking aser postal services kongshir, anungji India sorkari Maoists meshimeshia samatsütsü telemtetba agir inyaker.



TIR YIMYIM YIMOBILEM (EDITRIAL)

DIMAPUR THURSDAY, SEPTEMBER (RONGJUI) 25, 2025

Mobile phone mamshiba mapang

Asenok dang masü saka tangar tashitemeteter limatem nunga smart mobile phone amshiba ajanga nisungtem amajok nung mapang endokba aser amui junga maoba timtem ajurubatem lir. Ibai alima ajunga nung yimten yimsüsür aser lokti lenirtem asoshi tebilemtsü tulu kümogo. Atangji, asenoki mobile phone tali amshiba timtem aser takoksa indang jembidang, talisa tsüraburtemi tanurtem dak dang rangloker. Ajisüaka, iba timtem yabo tanur tain ta mali, joko tanü putu nungbo ajak dak keta lir. Aji oda, tanurtem dang nungibo tsüraburtemiang phone tamshinüba akümba agi, tanurtem aser apuani junga anepalu mesütetba aser mapang shitak nung amui moi mobile phone amshiba agi anepdang anü adoka mesaktetba kibong aika kümogo. Pei lima nung item timtem aser takoksa ajuruba meteta, Japan nungbo Toyoake yimti nung yimten yimsüsürtemi par yimti nung nisungtem dang anogo nung mobile phone ghonda ana dang amshitsü asoshi telemtetba ka metetdaksüogo. Ibai parnok yimten yimsüsürtem tatar senden nung latetba ozüing ka lir. Ajisüaka, iba ozüing sülen manidaktetertem asoshi temerenshibo mali aser ano lesson bushi dang aser mapa inyak dangbo smart phoneji amshitsü melar. Iba denji ano, school nung azünger tanurtem asoshi aonung 9:00 ako sülen aser parnok dang nungi tekapur kaketshir taintem asoshi aonung 10:00 ako sülen mobile phone mamshitsü asoshi yimten yimsüsürtemi metetdaksüogo. Iba ama yimten ozüing yagi nübortem dang smart phone kenyongi mamshitsü ozüing agütsür masü mesüra anogo nung ghonda ana dak tali mobile phone amshira temerenshi tulu alitsü ta masü aser aonung mapang shitak nung memejangi tesü tashi mobile phone amshiba putetra merenshitsü ta ka masü saka nübortem iba yimten telemtetba sülen tashi angaa anidakba ajanga, Japan nung Toyoake yimti nung alir kidang kibong nung kinungertem rongnung sensaksemtsü mapang tajung angutsü aser temang anema alitsüba nunga tuluka yaritsü yimten yimsüsürtemi imlar. Atangji, alima ajungba ya yimten ozüing takang aliba agi masü mesüra nübortem yimten ozüing sülen anidakba kisüing agia masü saka nübortem dak tangatetba aliba agi memeteti pei lima junga akümer. Aji oda, kodang yimteni ozüing sa mesüaka tangatetba agi inyaka aotsü asoshi, tang Japan nung Toyoake yimti nung amaji, nübortem dang mobile phone dang masü saka tanü putu yabo computer putu asünungji, personal computer, laptop aser tablet ama osettem dena mapang telatet ka dang amshitsü telemtetba agütsüra, nübortem asoshi ibaji sobaliba tasen aser tajung ka kümadoxksü. Aji oda, joko Toyoake yimti nung mobile phone ghonda ana dak tali amshira aser aonung tesü tashi amui mao mobile amshia mongra, itemji sobaliba nung aibelen akümtsü, anungji lokti nung nümadanga menokdaktettsü. Iba amaji loktiliba nung yimten ozüing dang nungibo sobaliba tashi tuluba akümer. Aji oda, ozüingibo ajak malentettsü saka sobaliba tajung agibo ajak alentettsü. Kasaji, ozüing agi nübortem dang yangi janaona teindok ta shijen shiaka odang endoker, saka kodang nisungtem dak sobaliba tajung monga tangatetba lidir, pei kidang aser kima janaba janaonaji yangji yimdong nung mashi ka nung endokang ta ashiyonga meindoktsü. Iba tangatetba nung, asen lima nunga oagi Japan nung Toyoake yimti nung nübortem nem mobile phone amshitsü mapang atakzüa yutsüba amaji, yimteni nübortem nem mobile amshitsü mapang ka latetaa yutsü asübo, iba jagi asen lima nung temelenshi tulu adokla. Atangji, tsüraburemia amshir, saka lanurtemi balaka smart phone amshia dang chiyonger, anungji parnok asoshi chi agütsüsangjia mobile phoneji akümer. Iba jagi smart phone amshia amshia tsürabur aser pei adianutem dang nungibo smart phonejiang anasatiba kinunger kümadoxer. Ano, tanübo Artificial Intelligence putu lir, anungji mapa ajak AI nem inyakdaksütsü, anungji asen mapa ajungaji 'artificial' kümadoxksü. Item ajakji mobile phone aser computer ajanga inyaktsü alinung, item osettem dakji dang nendaka melii asen daka temetetba alitsüla aser temang arakzüka inyaktsüla. Ibaji mobile phone mapang telatet ka amshi tenzükba nungi ataloktsü.

OLEMSABANG

AROGOTEMI SENTEM AMSHIBA

~ P. Renthly Jamir.

Mungdang aser Arogotemi tulus tamarener, takar shitibener aser lenimao ankomaung sensakpu lajar ajaki pei akaba yari temoatsü tenla aser tershilem Tsüngrem nem agütsüba sen nungi sen tali teimba ajangzüktsü atema sen tetemlok amshia inyakba (money lenders business) ya tim asü masü. Iba ya sen aputsüba linük temzüing agi melar asü masü, mesüra Lai nunga koma shia lir ka khen ka khen ta bushidanga metettsü merangdi.

Naga nung yashi tashi sen mali lia aru, sen ya asen limai arur ano küm aika masü. Anungji asen tsürabur sen aputepba yimya mali asü. Tsük dang liasü aji takartemi sensaker nem Tsüktem agüja tsükji aputepa chiyunga aru. Aser kodang asen limai sen aru iba mapang senji(tanü ama talubo masü) onsara senti nisung kar ket nung dang terara liasü. Saka kodang Naga nüchiso bushitsü tenzük tanem tanemi asen limai sen aru. Ano State ngur Election agia aodang sen talubosatsü tenzuka nübur tila tulu nati sen jenjang meteta aküm. Saka lokti Tentet aser kija kibongtemi sen sentem keta apushiba kanga bulua masü asü. Yamaji lia arudng 1980 nung Mokokchung Deputy Commissioner A.M Gokhale IAS alidang pai VDB tentettsü Asalentong yanglua pa Nagaland government nung Chief Secretary tashi tua inyakdang Naga lima nung village Development Board tenzük yim sen aser yim Tsük teimba akümtsü asalentong tenzüktsü. Iba ajanga yim ajaki yim account lapoker bank nung sen ayutsü aser kwi yudir governmenti paikaji(matching grant) enoksemtsütsü. Iba matching-grantji azüaponga yim ajaki sen teimba teimba toktepa yutep. Tsük bendenbaji tapuner mali sama-adok. Kechiaser Aoer tsük agi dang taküm lia aruba to kodang sen talubosa angu tsük to mesenmototsü tenzük. Ao lima ajunga yim sen tali tali zuina akum iba asalentong tajung asatetba asoshi India Governmenti A.M Gokhale nem nünyu senpet tetushi tulu (Award) agütsü. Kasajisa Ao lima nunga iba sen amshiba mapa ajanga Aor yimsüsür tajung Village Council Chairman VDB secretary aika Au senchi chia pei mapanungi anentsü yim aika item senotsü timi mamshiba ajanga yimtsü aten. Aser tamanger tajung aika kotaki moutettsüsa tanela nung alanga adok.

Ano maneni yamala sen amshibaji Ao lima nung Mokokchung, Mangkolemba, Changtongya aser Tuli Co-operative Banktem ajak nung yimdaklir society nungja balala multipurpose, ta farmers ta Tiyonglar society ta bank loan apuja yimdak yimtsüngtem nung sen aputepa sen talubosa amshi. Saka kobi melie society nung adener aika kimunglumung yokya shinu ajak sentsüh yong agutsü karbo par society purtemi taliba ki angenbanga yutsü. Joko societytem to agi Bank loan to recover mesütet parnok sen apudang kuli sütepa pawn(security) ayubato reprangdang nung kar pawnji Machilu ta zülutepa lir kar Shinünütsü Lungbanglu ta enoka lir tatem nung alu mangtemji reprangi aonung Machiluji kecha tesem nunga maka ano Shinünütsü lungbangluji reprangdang nung meimchiri senzütetla Lungren masü. Kechiyong Ao oshi nung Lungren onsara tamajung dang Shinünütsü ta ajar. Society ka ana dak alema shingaia loan to meyipa magatsütet, parnoki Pawn ayubato tangu nunga asükshi meronger tagila masü. Kechiyong Aor jaklanung yamai külakkepongtsü janga lir. Ibai shitak atalokba Co-operative bank ajanga sen aputsüba kuli lemsateper. Yamaji kar dak alema societytem tamakok nung anenba ajanga tang July aser August ita 2025 nung Mokokchung Division Changtongya Tuli dena aser Mangkolemba Sub-Division nung office ajanga sangtonga, item society tanaben mepishia shiti mezülura shibangtsür ta shiti agütsüogo. Item society asüba dang masü ano Aotsür Aor aika sen apurtem aser tetemlok keter sen apushirtem sentsüh maoteti takaba ajak sentsüh yong agütsür koloni aoar memetet telungi iogo. Ano taputsürtema tali temloka aika angutsü teimla nung takaba ajak temshia aputsür sentonga mangu shisa tatem nung telongpur Faction balala nem case agütsü, saka parnok nem agütsüba yabo shitsu(monkey) nem amsuk seret amdaktsüba den kasadang lir. Tesüiba tatalokbatemji yutsür, tang Modiba governmenti sen tali apuja lokti tentet nungja zünger mezüngma, lir asen Ao lima nung zünger telok society tapu balala ano tetsür teloksa teimba watsülar, Rongmalar, Ayoklar society Imchalar Dorka cell, ta Self-help Group ta sentem amshir. Parnokji sentem(interest) 5% ta 3% ta ishiba agi apushitepa amshir.

(Maneni asüing adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Cuba nung pastor kati linük atema ghonda 1,000 sarasademtsü ayongzük



Cuba nung Las Tunas province kübok Puerto Padre nung aliba Evangelical Pentecostal Church nung pastor aser par Arogo nung züngsemtem tangokba noksa nung angur.

September 24, 2025: Cuba nung Las Tunas province kübok Puerto Padre nung aliba Evangelical Pentecostal Church nung pastor-i linük nung Khristantem longjema alitsü aser linük atema ghonda 1,000 sarasademtsü ayongzük.

Tang Cuba nung rongsenkettzüng jenjang kanga mejungi aliba den külemi chiyungtsü agi anüngba aser loktiliba nung tesünep maliba ajanga nüburtem kanga timtemba mapang ka nung Arogo leniri Tsüngrem dang teyari meshia sarasademtsü ayongzüaker.

Pentecostal Arogo nung pastor-i video ka ajanga, "Onoki iba linük nung Khristan ajak, Arogotem aser council ajak

dang onoki ayongzükba sentong nung shilem agia sarasademtsü mepishir," ta metetdaksü.

Pastor-i, "Joko aikati timtem metizükteter. Anungji nüburtemi ajemalur Tsüngrem dang teyari meshia sarasademtsü nüngdak," ta metetdaksü.

"Iba ama timtem tensa mapang ka nung tanela asentenshi nüngdaker aser alishi nüngdak balala atema sarasademtsü nüngdaker," ta pai metetdaksü.

Cuba nung sorkari ashiba agi, 2023 küm rongsenkettzüng ainba shilem 2 ajema aküm aser 2024 küm nunga shilem 1.1 ajema kümogo. Cuba nung nüburtem chiyungtsü agi anüngba dang masü saka anogo shia light ghonda 10-16 tashi

marur, nisung million 1 tzü agi anünger, totzü aser mozü agi anünger.

Cuba nung alirtemi timtem marem 2020 küm nungi tenzüka tang tashi nung Cuba nung million 1 dak tali bendang linüktemi oadokogo.

Tang Cuba nung Communist Party lir, aser iba linük nung independent media mesüra opposition mali.

2024 küm March ita nung nüburtemi longkak aita light aser chiyungtsü agüjang ta takhangba agüja liasü. Iba mapang nungji sorkari China-i agütsüba jang densema chiyungtsü balala agütsütsü aser light agütsütsü nangzüka liasü saka tensa tajungba makümer.

ANOGO ABEN TSÜNGREM DEN

Samaba San

Ajiang, ni kü sasa, oda nisa kü santem bushitsü aser parnok angutsü (Ezk 11:11)

Tang sannüker tajung asoshi shisadangdi. Sannüker tajungi pei san asoshi alinük talangi oa bushir. "Parnok prokshia aliba nungi ni parnok kümzüksü." Pai tenem lenden ajak nung samaba san bushia aor. Aser tulusang tebushisangi mesemdangba meta kecha mali. Sama aliba san ajaki sannüker tsüngnep meteta lir. Aser pai ni linük talang nung aliba metet aser pai ni bushi.

Sannüker tajungi nemzüa aliba san kidangi meyiba bener arur. "Ni parnok pei limai anir arutsür" Asenok asüküm linük, nungi ajemaluba kidangi shilanger, temeim makadak nungi taochi dangi arur, amajok temenen nungi tepur tajung temeshiba dangi arur. Teti taküm tesangwa aser tesünep Tsüngremer tepur tajung labu naro lendeni asenok arur. Aser sannüker tajungi kidangi meyipba arur nem chiyungtsü agütsür! "Ni parnok rem lanu agi mesutsü." Asen tashi jena aliba tasen kümshitsü, aser taochi temo chiyungtsü agi tashi itshtitsü. Temeimji chiyungtsü alitsü! Ni ne tejangraba "oset tajung agi tiptemdaksütsü".

Khristantem atema Nigeria Religious Freedom Accountability Act benok



US. Senator Ted Cruz

September 24, 2025: US. Senator Ted Cruz (R-Texas)-i Nigeria Religious Freedom Accountability Act 2025 benok; iba bill ya Nigeria nung Khristantem aser tanga minorities kümzüksü atema renemba bill lir, ta International Christian Concern (ICC)-i metetdaksü.

Ozüng alema inyaksü asoshi Nigeria sorkari Islamic telok balala nem temelaba agütsüba aser Tsüngrem mezüngmeshiba ozüng benokba ajanga Nigeria nung tai maket nisung aika tepseter; itemji nokdangtsü nükjidong nung iba bill benok.

Senator Cruz-i, "Islamic telok balalai Nigeria nung Khristantem tepseter aser kangshia Sharia ozüng benoktsü meranger. Iba ama ozüng alema inyakba atema Nigeria nung ketdangsertem anema inyaksüla aser tenokdangba balala benoktsüla. Iba atemaji Nigeria Religious Freedom Accountability Act ya renem. Ni külem züngsemtem dang iba ozüng ya tekeraba nung agizüktsü atema inyaksü mepishir," ta metetdaksü.

Nigeria nung 2009 küm nungi tenzüka Islamic telok balalai Khristan 52,000 dak tali tepsetogo. Tenla ki, seminaries aser Arogo kiojen 20,000 dak tali raksatsüogo aser ibaji ajanga yim aika nung Khristantem tekülem sentong agitsü atema Tenla ki makai kümogo aser kaketshirtem shisaliok atema

reju makai kümogo.

Talisa Plateau, Kaduna, Benue aser Borno state tem nung mapang shia telok balalai Khristantem amaker aser Khristantem meyong kiojen rakzüka agir.

Taküm June 13 nüa north-central Nigeria nung Fulani teloki Khristan 200 dak tali tepseta liasü. Nigeria nung Boko Haram aser IISIS-West Africa-ia Khristantem jenti tepseter.

Ano iba dak alia Nigeria kübok state 12 nungbo Sharia ozüng tesashia benoka lir. Iba ozüng ajanga loktii tashi amshitsü atema tashi agütsür.

2015 nungi 2023 küm tsüngda Nigeria nung Tsüngrem mezüngmeshiba ozüng kübok tai tonglokja loktii nisung 150 dak tali tepsetogo.

Nigeria Religious Freedom Accountability Act of 2025 ya agizüka ozüng akümstsü atema U.S. Secretary of State-i Nigeria ya Country of Particular Concern (CPC) list nung züngoktsüsa akümstsü. International Religious Freedom Act kübok Boko Haram aser ISIS-West Africa telok naprongla ya Entities of Particular Concern list nung züngoka lir.

Iba Act ya agizükra European Union aser United Nations densema alima linüktemi Nigeria anema inyaksü aser tenokdangba balala benoktsü.

Congo nung Tenla kidang nisung 64 tepset



Democratic Republic of Congo (DRC) nung North Kivu province kübok Ntoyo yimdak Saint Joseph of Manguredjipa Tenla kima asüpila sentong agitsü lia tangokba noksa nung angur.

September 24, 2025: Tan ita tetenzüklen (September 8, 2025) Democratic Republic of Congo (DRC) nung Tenla ki ka amakdang nisung 64 tepsetogo.

September 8 ayaterm mapang Islamic telok Allied Democratic Forces (ADF)-i North Kivu province kübok Ntoyo yimdak Saint Joseph of Manguredjipa Tenla ki amakdang Khristan aika tepset.

Khrisantemji mangyimba sentong ka nung adentsü atema Tenla kidangji adenshia aliba mapang nung ADF züngsemtemi nok aser prangpong bener arua amak.

Khristan melungtet telok Aid to the Church in Need (ACN)-i iba tatalokba sashia aitsüba den külemi mangyimertem den

tejashi lemsatepogo.

ACN-isa, DRC nung IS-CAP (Islamic State's Central Africa Province) den tesendaktep aliba kiralongrartemi mapang shia Khristantem amaker, ta metetdaksü.

ADF ya mezüngbo Uganda nung sorkar anema nokdakba telok ka liasü, ajisüaka tesülen parnok anüdoklen Congo-i aru aser 2019 küm IS-CAP den tesendaktep yanglua liasü. Iba mapang nungjagi tenzüka parnoki Congo nung Khristantem amaker.

Ita ka tejaklena Ituri province nung ADF teloki Tenla kidang Khristan 34 tepset aser July ita nunga Komanda nung Tenla ki ka amakdang Khristan aika tepsetogo.

Taküm February ita nunga Lubero nung aliba Protestant Arogo ka nung Khristan 70 dak tali tepset. Parnok teimbaka teka alener liasü aser tekolak tangzüka liasü.

DRC nung Congolese armed forces, Uganda sepaitem aser UN peacekeeping mission (MONUSCO) liaka North aser South Kivu nung Khristantem amakba manener.

Congolese bishops' conference-i mapang shia Congo nung Khristantem amakba aitsür.

ACN-ia Congo nung Khristantem tepsetba nokdangtsü aser tamangba yimsü temeden kümzüka ayutsü atema alima linüktemi inyaksüla, ta takhangba agütsür.

AO OSHI ANGAZÜKDAK:**TANÜ ANGAZÜKTSÜBA OJANG****Tezüngjang**

(n) tebok telonglen aliba tejang ana, iba yagi temang nung tzü merüktetsür (kidney)

* Tezüngjang ajanga temang nung tzü tamajung natzü kümer yoker.

Tezüngkang

(v) zünga zünga temulung nung ayuba (good memory)

* Tezüngkang nisungi senotsü junga ketdang asür.



Tir Yimyim

OLONG PAITEP # 7281

1		2				3		4		5
				6						
	7		8							
9					10			11	12	
			13		14	15				
16					17			18		
				19	20					
21		22								23
24										

TIPIEN

1. Saku - (4)
6. Songjen - (7)
7. Mali/Tazüng - (4)
9. Tasen apok - (6)
11. Songtem - (3)
13. Ata liasü - (5)
16. Tzünglu den külemi tsüker - (3)
17. Aso tila - (6)
20. Tashi maküm - (4)
24. Tenüng kasa jatepba - (7)
25. Ki yangluba oset - (4)

LANGTSÜNGLEN


1. Taksep - (3)
2. Langtem - (5)
3. O tamendaktak - (4)
4. Nütsü tebuba - (3)
5. Anüngdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. _ _ _ tatsü - (3)
12. Tebur kidong aser zünga kasa tsüngda jatepba - (4)
14. Pela agizükba tapu ka - (5)
15. Tenüng atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 7280 TELANGZÜBA**TIPIEN :**

2. Pongsen, 5. Lepko, 7. Omen,
8. Maongka, 10. Yangkhu,
12. Senpong, 14. Angu, 15. Raksa,
16. Arameso,

LANGTSÜNGLEN :

1. Alimang, 2. Pongen, 3. Samaru,
4. Nün, 6. Pio, 9. Nüngdak,
10. Yongya, 11. Kongro, 13. Ora,
14. Ata.

NAI-A YA METETTER

August 29, 2025 nü India nung National Sports Day amungdang Tamil Nadu nung arishi küm trok tain Thevaky B Rajkumar-i tenük nembanger 155-foot rock cliff ka soa alutet. Kancheepuram District kübok Malaipattu nung Good Earth School, Tambaram nung Class 1 kaketshir Thevaky-i minute pezü ser second 32 nung lungren talang soa alutet. Iba ajanga lai "youngest girl to perform blindfold rock rappelling" otsü yangluogo aser Asia Book of Records, India Book of Records, aser The Noble Book of World Records ajanga kuli agütsüogo.

Assam Police-i Rs 90-crore alang YABA tablets apu

Guwahati, September 24, 2025 (Agencies): Northeast India nung narco-network anema takok tulu ka nguogo aser ibaji Assam Police-i tawa drug aika makdokba lir.

Cachar Police-i mapa tajung

inyakba ajanga smuggling chain nung timtem agütsüogo.

"Rs 90 crore alang drugs puogo. Cachar Police-i kidanger state ka nungi aruba gari ka mita reprangdang YABA tablets lakh 3 apu. Iba dak sendakba nung

drugs shibelener ana apu aser tena tepuokdak lir" ta Assam CM Himanta Sarma-i metetdaksü.

Osang tejangja ka angazükba sülen police-i mita atadang gari ka nung YABA tablets bener aruya aliba apu.

Zubeen Garg asüba CBI-i bushisüngdang asütsüla: Assam Congress

Guwahati, September 24, 2025 (Agencies): Leader of Opposition in the Assam Assembly, Debabrata Saikia-i President Droupadi Murmu dang Zubeen Garg ajunghena asüba bushisüngdang asütsü takhangba agütsüogo.

Gauhati High Court nung sitting mesüra retired judge ka lenisüba kübok CBI nem Zubeen asüba bushisüngdang südakjang ta Debabrata Saikia-i shidi ka zülü.

"Asür Zubeen asüba ya süoki ia bilemtsüba onük ka lir aser pa asüba nung taitsü keta lir. Pa asüba ya tasa ka atonga inyak ama bilemer. Assam CID

nem bushisüngdang asütsü nunglokja lir saka lendong ya Singapore nung atalok asünung state police-i central teyari magii mapa inyaka moutettsü" ta paisa ashi.

S H Y A M K A N U MAHANTA ASER PAR TELOK NOKTANGER

Külen Assam Chief Minister Himanta Biswa Sarma-i Shyamkanu Mahanta aser pa den sendaktepa aliba teloktemi Assam nung sentong ayonga magitsü tenokdangba agütsüogo.

"State sorkari Syamkanu Mahanta aser pa den sendaktepa aliba telok ajaki

Assam nung sentong mesüra benjung kecha ayonga magitsü noktanger. Maneni, state sorkari pa den sendaktepa aliba telok kecha nem-a financial grant, advertisement, mesüra sponsorship kecha malitsü" ta CM Sarma-i ashi.

"State sorkarisa India sorkar dang pa nem senotsü teyari mesüra sponsorship kecha magütsütsü atema shidi zülutsü" ta paisa metetdaksü.

Singapore nung nüngtugu kentener Zubeen garg asüba sülen North East India Festival chief organiser Mahanta, aser Garg manager Sidharth Sarma na anema FIR aika benoka lir.

Meghalaya nung ad hoc tesayurtemi lungkak aiter

Shillong, September 24, 2025 (Agencies): Meghalaya nung ad hoc school tesayur noklang aikati Shillong nung service regularize asütsü, itasen ajungkettsü aser sorkari nangzüka alibatem inyaktsü takhangba agüja lungkak aitogo.

Iba ya Federation of All School Teachers of Meghalaya ajanga ayongzük aser tesayurtemi Shillong nung tetsüng agi jajaa lungkak ait.

State sorkari küm ana tejakdang nangzükbaten ano meinyaker ta tesayurtemi tai

tongloktsü.

Meghalaya nung ad hoc tesayurtem deficit system nung anioktsüla, annual salary increment 5% atutsüla, retirement age 60 nungi 65 akümtsüla aser December 17, 2023 nü Education Minister Rakkam A. Sangma-i nangzükbata onüktem inyaktsüla ta parnoki akhangar.

Meghalaya nung ad hoc tesayurtem service benefits melii fixed honorarium nung inyaker. Parnok ya lower & upper primary, secondary, aser higher

secondary levels nung inyaker.

Tang lower primary tesayurtem nem itasen Rs 18,000, higher secondary staff nem Rs 33,000 aser science tesayurtem nem Rs 31,000 agütsür.

"Ad hoc tesayurtemi regular tesayurtem ama kasa dang inyaker saka benefits magütsür. Sorkari ad hoc system yanglushitsü atema policy tajung ka yanglutsüla. Onoki akhangba ama meinyak tashi lungkak aittsü" ta Vice President S. Jungai-i ashi.

Assam sorkari online application ajanga Zubeen Garg aut alemtsü

Guwahati, September 24, 2025 (Agencies): Assam sorkari online application system ajanga asür Zubeen Garg indang mang rongdokba aut telok aser kijatem nem agütsütsü osang metetdaksüogo.

"Assam Cultural Department-i iba maparen ketdangsüa inyaktsü" ta Education and Cultural Affairs Minister Ranaj Pegu-i ashi.

Mongulbarnü Guwahati tezülen aliba Kamarkuchi nung asür Zubeen nem full state honours agüja pa mang

rongdok.

Iba mapa atema portal ka lapoktsü. Iba nung telok aser rejutemi asür Zubeen indang aut atema application agütsütsü akok. Rejutemi meshiba sülen aut anünga kija applicants nem-a agütsütsü" ta Minister Pegu-i ashi.

"Pa mang rongdokba tesem akangakanga anüktsü. Iba tesem nung boundary wall yanglutsü. Kamarkuchi memorial site nung security atema state police camp ka amenoktsü" ta Pegu-isa metetdaksü.

Chief Minister Himanta Biswa Sarma-i ashiba ama Zubeen Garg indang aut shilem ka Jorhat-i bener aotsü.

"Pa sür anogo 13 buba den sendakba maparen Jorhat nung inyaktsü aser Zubeen tenüng nung nüngshilung ka yanglutsü. Iba atema Jorhat nung tesem reprangdangdar" ta Minister Pegu-isa metetdaksü.

Assam nunger atema Zubeen Garg ya singer aser composer ka dang masü saka sobaliba tsütsü apu ka ama liasü.

NATO teyari nung Ukraine-i tesem balala meyipa agitettsü: Trump

New York, Rongjui/Sept. 24 (Agencies): Russia-i agia aliba tesem balala Ukraine-i meyipa agitettsü südi ta imlar, ta US Tir Donald Trump-i Mongulbarnü ashiba ajanga US leniri Kyiv dang rara tembangtsü asoshi alinük kar agütsütsü jembia aruba melenshir.

Alima nung lenirtem United Nations General Assembly nung adentsü asoshi adenshia aliba mapang Trump-i Ukraine Tir Volodymyr Zelenskyy ajuruba sülen pai iba o ya social media nung lemsatepa liasü.

UN General Assembly nung aritepa France Tir Emmanuel

Macron den senden ka amenba mapang, Russia nem rakzükdakja aliba tesem ajunga Ukraine-i tanaben agitettsü akok, ta Tir Donald Trump-iashi.

"European Union teyari nung Ukraine-i raraa mezüng ama litsü ajunga nung takok angutsü jenjang ka nung lir ama nibo bilemer. Mapang, aremzükbä aser Europe nungi aser talisa NATO nungi senotsü teyari nung rara mezüng tenzükdang aliba arütsü alitsü teimla lir," ta Trump-i zülü.

Tang Trump-i tashi itshia bhukumba ama inyakra, ibai Zelenskyy asoshi takok tulu

asütsü, shibai US tir dang Russia Tir Vladimir Putin rara tatembang kati arudaktsütsü asoshi ajungshitsü jembia arur. Trump-i taoba mapang, 2014 küm Russia-i Crimean Peninsula rakzükbä sülen agiyonga aruba litsü-lika ajunga kodanga Ukraine-i tanaben magitettsü, ta shia liasü.

Trump-i yamaji ashiba ajanga Zelenskyy, European aser Ukraine nungertem kanga jashia liasü aser UN tamendakba nung US-i shidak meinyaker ta aitsü. Saka tangbo Trump-i iba tongpang indang angatetba ya Ukraine tsütsü tali lir, ta Zelenskyy-i ashi.

Trump-i 2024 nübuyim mapang iba rara yakta tembangtsütsü ta shia liasü, saka taoba ita pai Putin den senden amenba aser White House nung Zelenskyy aser European linük lenirtem den senden amenba mapang pa sentong nung tetsükdaktsü ajurur ama liasü.

Trump-i UN nung alima lenirtem den jembidang, 'iba rara asoshi pangzüng ka yanglubaji temelatiba asütsü südi ta bilema liasü, kechiaser pa Putin den tesendaktep tajung lir,' ta ashi. Pai Russia nem tenokdangba tali agütsütsü mulunga lir ta ashi Europe dang

yangji adentsü ayongzüük.

"Russia ya nükjidong maka küm asem ser tasadang rara arur, koba Real Military Power-i akoktsü asoshi hopta ka dang tajemba agitsü. Iba yagi Russia ya balaka kumdaktsür masü. Adangji nung parnok ya "paper tiger" ka ama kumdaktsür," ta Trump-i social media nung zülü.

General Assembly nung jembidang, Ukraine nung rara yagi Russia tereprangtsü majung kumdaktsür, kechiaser ibai aritepa tesem tila kar nung amaktsüba dang liasü, ta Trump-i ashi.

(Maneni tapak 8 nung...)

Italy-i flotilla yaritsü atema navy rong ka yok

Rome, Rongjui/September 24 (Agencies): Gaza nem teyari agütsütsü meranga aliba international aid flotilla-i Bodharnü ashiba agi, manger mesangwa tsüngda Greece anasa international tzüym nung parnok drone agi maka liasü. Iba sülen Italy-i parnok nem teyari agütsütsü atema navy rong ka yokogo.

Global Sumud Flotilla-i, Gaza nem Israel indang navy-i tenokdangba agütsür aliba nongpoka aotsü atema civilian rong 50 shi amshidar, kong Sweden tsür climate campaigner Greta Thunberg densema obendanger aser activists tem aika densema lir.

Item rongtem ya Greek kübok Gavdos asetkong nungi 30 nautical miles shi pilar international tzüym nung drone 12-i maka liasü, ta "March to Gaza Greece" (flotilla nung shilem ka) atema otongdar Marikaiti Stasinou-i ashi.

Rongtem kolak nung drone tem apokba sülen passenger tem ajak kümzüka lir, ta lai Reuters dang ashi.

Italia Defence Minister Guido Crosetto-i sangdong ka

ajanga ashiba agi, rongtem ya mejangiaba telok kati makdar. Paisa, iba tatalokba ya ajang ajanga aitsüogo. Crosetto-i ashiba agi, Italian multi-purpose frigate Fasan koba Crete leni oya liasü, iba rong ya flotilla leni odar.

Italy nung ketdangsür kati ashiba agi, Italy nungertem nem teyari agütsütsü atema navy yokogo. "Nüngdak dang süra onok indang rong nung mozükia keta lir," ta pai ashi.

Israel-i, flotilla inyakyim aija arudar aser parnok inyakyim ajanga Hamas militant group nem teyari agütsüba atema aitsüogo.

Bodhbarnü foreign ministry-i X ajanga, Israel indang rongnedak teyari agütsütsü atema oset balala bener aruba tokja, Gaza nem teyari agütsütsü asoshi Israel nung ketdangsürtem ket nung toktsütsü atema benokba magizükra Israel-i parnok nokdangtsü atema jenjang tapet agitsü, ta shiogo.,

Item rongtem amakba dak sendakba nung Israel military-i kecha telangzüba agüja mali.

Leftist Greens-European

Free Alliance group atema European Parliament nung Italy nung züngsem Benedetta Scuderi, shiba flotilla nung denogo lai Italian public radio RAI dang drone tem yagi stun grenade tem tsükdakja liasü ta ashi.

Drone tem rongnung kati la mena aliba rong indang mast nung kongshi aser sail raksaja liasü, ta ashi.

"Onok Crete south len international tzüym nung lir aser shingaia kecha teyari magütsüi onok ghonda asem shi maka liasü," ta laisa shisem.

G r e e k c o a s t g u a r d ketdangsür kati Reuters dang ashiba agi, flotilla züngsem kati parnok den Bodhbarnü 0200 m e t a tongtepratepa iba tatalokba i n d a n g metetda ktsü.

European Union indang border agency Frontex-i parnok den tongtepratepba mapang flotilla-i t e y a r i menüngdaker ta ashi, ta ketdangsür yagi shisem.

GOVERNMENT OF NAGALAND

DIRECTORATE OF PRISONS

NAGALAND: KOHIMA

NO. PRI/HQ/ESTT - 559/22

Dated Kohima the 24th September 2025

NOTICE

In pursuance to this Office Advertisement NO. PRI/HQ/ESTT-559/22 Dated 22nd May 2025, and in continuation to this Office Notice of even No. Dated 15th August 2025 and 11thSeptember 2025, the list of candidates shortlisted by the Departmental Recruitment Board for the Written Test is uploaded in the Prison Department website <http://prisons.nagaland.gov.in> and the Notice Board Prison Directorate, Kohima vide Notification No. PRI/HQ/ESTT-559/22 Dated 24th September 2025.

Sd/-

(RENCHAMO P. KIKON) IPS

Director General of Prisons, Nagaland, Kohima.



IndianOil

METETDAKTSÜR

Indian Oil Corporation Limited (IOCL)-i iba sangdong ajanga, ST Category kübok Burma camp, Dimapur- 797112, Nagao nung IOCL B-Site Retail Outlet (RO) ama M/s PAT Agency koba proprietor asür Patrick Lotha Yanthan indang lir iba ya 26.03.2014 nungi inyaksangshi masür ta nüburtem nem metetda ktsür. Maneni proprietor asür Patrick Lotha Yanthan ya 24.09.2021 nung süogo.

Corporation-i dealership tanaben constitute asütsü aser asüngsashitsü atema tesüsabuba meteta aliba address tem aser legal heirs ajanga tongteprateptsü merangaka telangzüba kecha mangu. Iba sülen termination (Ref. No. TDO/R/NIL/160168/723 DALL dated 29.12.2022) atema Show Cause Notice aser 13.06.2025 aser 11.07.2025 nü Guwahati nung jurila ken o angadangtsü asoshi legal heirs nem shitia agütsüogo.

Ajisüaka tanü tashi nung telangzüba kecha ngua mali anungji IOCL-i iba tatembangbuba notice ajanga M/s PAT Agency indang dealership thitsütsü asoshi jenjang agir. IOCL-i asür Patrick Lotha Yanthan'er legal heirs tem dang osang agütsüba sülen tsüngtong arua mesüra mesüra registered Post ajanga anogo 30 tsüngda representation benoktsü metetda ktsüogo.

Divisional Retail Head

Tinsukia Divisional Office, Indian Oil Corporation Limited, Sripuria, Tinsukia - 786125, Assam.

Atakzükbä anogo tashi nung representation mebenoktetra IOCL-i jenjang agia dealership thitsütsü aser iba sülen representation kecha magizüktsü.

UN-i nokdangaka China dang maneni totzü ayoktsü: Iran oil minister

Dubai, Rongjui/September 24 (Agencies): U.N-i Iran nem tenokdangba balala tanaben agüjaka Iran indang totzü China dang maneni ayoktsü, ta Iran indang Oil Minister Mohsen Paknejad-i Bodhbarnü ashi. Iran aser Europe nung aliba linüktem tsüngda tenokdangba agütsütsü aliba dak sendakba nung tangatetep ka dangi maruteti aliba mapang tang Mohsen-i iba olen lemsatepogo.

France, Britain aser Germany, shirnok dang E3 ta ajar, item linüktem nungi foreign minister tem den EU indang foreign policy tekolakba Kaja Kallas nungeri Mongolbarnü U.N. General Assembly nung shilem agiba mapang Iran nunger ketdangsürtem den

ken o bentettsü atema sensaksema liasü.

August 30 nü E3 yagi Iran nem tenokdangba agütsüshitsü atema anogo 30 inyakteptsü benok. 2015 küm nuclear weapon yangluba dak sendakba nung linük balala den nangzüktepba ama Tehran-i minyaker ta shia parnoki iba jenjang agi. Tenangzüktepba ka meyanglutetra September 27 nü nungi tenokdangba agütsütsü.

Europe nung aliba linüktem yagi Iran dang parnok indang nuclear facility tem semdangtsü atema U.N. nuclear inspector tem nem temelaba agütsütsü khanga arudar aser iba den ano United States dena sensaksemtsü ayongzükogo.

(Maneni tapak 8 nung...)

GOVERNMENT OF NAGALAND

DIRECTORATE OF TECHNICAL EDUCATION

NAGALAND: KOHIMA

Dt. Kohima, the th Sept., 2025

NOTIFICATION

NO.DTE/ESTT-2/NEET/01/2024-25/ Apropos to the letter received from North Eastern Institute of Ayurveda and Homoeopathy (NEIAH) vide letter NO.ACE-13011/1/2024-Adm Div-H-1078 dated 4th September, 2025, interested candidates who have qualified NEET-UG, 2025 and have qualified for the State Quota in Medical and Allied course are hereby invited to fill the following seats.

Course	Bachelor of Ayurvedic Medicine & Surgery (BAMS)	Bachelor of Homoeopathic Medicine & Surgery (BHMS)
Seats allocated to Nagaland (N.E State Quota)	3 seats	3 seats

This notification supersedes the earlier notification dated 29th July 2025.

IMPORTANT:

1) Application citing interest to take admission in these courses shall be submitted to the undersigned on or before 6th October, 2025 during office hours by hand.

2) Selection among applicants shall be done on the State Merit List of NEET-UG 2025.

3) List of selected candidates shall be notified on the Departments website <https://dte.nagaland.gov.in> on 8th October, 2025.

4) Nomination letter for selected candidates shall be issued on 9th October, 2025 during office hours.

(Er. VIPULHOU LHOUNGU)

Director

NSF MM Trophy: Dimapur Chaos-i goal 6 agi Phesazou kokogo



Chiechama ayong ayonga kokogo.

Dimapur Chaos-i iba asaya goal trok agi koka liasü.

Asaya nung mezüngbuba goal ya Gangchui-i minute 6buba nung idaktsü, Apeto-i goal asem idaktsü aser Asezo aser Mughatuto nati goal kaka idakja liasü.

Iba asaya atema Dimapur Chaos nungi Hivika nem match patron Temsu Longkumer, district Horti Officer Chumoukedima aser Nuiland-i player of the match naroküm agüja liasü.

September 25 nü asaya:

Kuki United FC vs Medziphema FA @5pm.

NAA-i achaayanga state selection trials agitsü

Dimapur, Rongjui/September 24 (TYO): Nagaland Archery Association-i sangdong ka ajanga NAA nung züngoksema aliba District Associations ajak dang, December ita Senior Nationals nung shilem agitsü atema State Selection Trials agitsü ta metetdaksüogo.

District association ajak dang jenjang tapet agia iba trail atema archer tem yoktsü asoshi mepeshia metetdaksüogo. Anogo ka agitsü aliba trail ya

October 10 nü DGP Archery Ground, Chumoukedima nung agitsü.

Trails ya tetsür aser tebur naprongla atema item disciplines tem nung agitsü:

1. Indian Round
2. Recurve
3. Compound


Tetsür aser tebur naprongla tetoktepba nung discipline shia nung temaba jenjang nung tembangba asayar asemsemi Nagaland tenüing nung Senior Nationals nung asayatsü. Iba

asayamung ya December ita Hyderabad nung asayatsü renema lir.

Trails dak sendakba nung district association tem ajaki pei district nungi asayatem tenüing October 6 nü tashi nungbo agütsüta metetdaksüogo.

Trials agiba sülen teshimtetba asayatem atema coaching camp ka ayongzüka agitsü, koba mapangtong nung metetdaksüta, ta Nagaland Archery Association, Secretary Asalie Peseyie-i metetdaksüogo.

Barcelona nungi asayar Gavi ita 5 shi masayatetsü



Rongjui/September 24, 2025 (Agencies): Barcelona midfielder Gavi, temekok surgery agiba sülen tang asaya aliba season nung ita pongu shi masayatetsü.

Arishi küm 21 tain asayar ya season tasenba nung Barcelona pur mezüngbuba asaya ana nung asayaba sülen August ita

training agiba mapang temekok tachichilen yirua liasü.

Spain nunger international asayar ya 2023 küm anterior cruciate ligament (ACL) yiruba tanaben yirushi asütsü ta tsübua bilema liasü.

Scan asüba sülen Gavi ACL bo miyiru ta jangjaogo, aser pa cartilage raksar aliba yanglushitsü atema operation agia liasü.

"Medial meniscus yiruba anepalutsü atema Gavi arthroscopy ka agi, koba meniscus kümzüka ayutsü atema liasü," ta Barcelona-i sangdong ka ajanga metetdaksü.

"Pa ita 4-5 tsüingda aneptsü

imlar," ta kasa sangdong ajanga metetdaksü.

Gavi ya 2021 küm mezüngbuba Barcelona nungi asaya aser iba mapang pa ya club puti otsü nung asayar tanobusang rongnung pezübuba aküm.

Pai, asaya 155 nung goal 10 idaktsüogo aser takok marok pongu koker lir.

Pa 2023 küm November ita Spain tenüing nungi asayaba mapang ACL yiruba sülen ita 11 tashi masayai liasü.

Barcelona pur tang La Liga nung Real Madrid sülen tanabuba jenjang nung lir. Parnoki Real pur point pongu agi memenepi lir.

AIFF Super Cup Goa nung asayatsü

Rongjui/September 24, 2025 (Agencies): Season tasen nung mezüngbuba asayamung Super Cup ya Goa nung October 25 nü nungi tenzüka asayatsü, ta All India Football Federation (AIFF) ketdangsür kati Mongolbarnü ashi.

Odisha FC dak alaka Indian Super League (ISL) club ajaki iba asayamung nung shilem agitsü mulunga agizükogo. I-League team, Inter Kashi, Real Kashmir, Gokulam Kerala FC, aser Rajasthan United nungeria iba asayamung nung shilem agitsü.

Osang ajanga ashiba agi, I-League club tem rongnung top three nung aliba club Churchill Brothers puri iba asayamung nung shilem magitsü telemtetba agiogo aser parnok melena Gokulam Kerala asayatsü,

shirnok pezübuba nung tembanga liasü. Rajasthan United shirnok pongububa nung tembanga liasü, parnok Odisha melena asayatsü.

Asayamung atema draw ya Brehostibarnü virtually asütsü.

Yimya agi Super Cup ya season tatemi asayaba asayamung ka lir, saka taküm mepetmesü kar aliba ajanga season tetenzükiang asayatsü.

AIFF-isa, Super Cup akokba team ya 2026-27 season atema AFC Champions League 2 play-offs nung asayatsü atema maongka agütsüta ta shiogo. Ajisüaka asayamung akokba team ket nung Indian Club Licensing Regulations kübok Premier 1 License alitsü nüngdaker.

Super Cup 2024-25 akokba

sülen FC Goa ACL 2 play-offs atema qualify süogo.

Toba mapang AIFF-i ashiba agi, ACL 2 play-off nung asayaba India team kati qualify mesütetra parnok AFC Challenge League (ACGL) group stage-i automatically aitsü, koba continent indang club tetoktepba jenjang tasembuba lir.

AIFF aser league ayonger, Football Sports Development Limited (FSDL) na tsüingda Master Rights Agreement (MRA) renewal dak sendakba nung ken o mebentetti aliba ajanga ISL asayatsü masayatsü mejangjai liasü.

Ajisüaka Supreme Court-i tawa AIFF indang temzüng özüng tasenba agizükogo, anungji iba ken o ya yakta jangjatsü imlar.

Kohima, Rongjui/September 24 (TYO): Bodhbarnü Chumoukedima Football Stadium nung NSF Martyrs Memorial Trophy nung Dimapur Chaos-i Phesazou SC

BENDANGLI OSANG : Tapak 7 nungi...

NATO teyari nung Ukraine-i...

"Iba yagi lenir kaji tejanga sayur, lenir majungba ajanga linük ka asoshi kechi inyaktsü, aji sayur. Anatsülen nisung kwi menüingdakba nung takum samatsü," ta pai ashi.

Zelenskyy majurudang Trump-i iba rara tembangtsü asoshi terenlok tulutibaji tang Russian rongsenketzüng jenjang kanga mejungi aliba ya lir, ta shia liasü. Trump-i European linüktem dang Russia indang totzü aser natural gas aliba anentsü ayongzüka ya nia shidak ta agizüker, ta Zelenskyy-i ashi.

"Ukraine-i tang tashi raraba atema onoki akum tulu agütsür," ta Trump-i Zelenskyy dang ashi.

"Russia-i rara tembangtsü asoshi tezüngzüktep ka yanglutsü renema melira, iba azüdokshi yakta anentsüsa tariff kanga tashi tulu benoktsü United States renema lir," ta Trump-i General Assembly nung ashi.

Ajisüaka pai Europe dang tetsüing ajemoka Russia indang totzü aliba anentsü nenshia ashi.

European Commission Tir

UN-i nokdangaka China dang...

Tenokdangba agütsüta amokmerenba mapang China dang totzü ayoktsüba indang asüingdang dang Paknejad-i, "parnoki maneni alitsü. Onok atema kecha tebilemtsü mali," ta ashi.

Tenokdangba agütsüshiba ajanga Iran indang totzü ayokba dak sendakba nung tetsükdaktsü talila matoktsü, ta pai ashi.

Ursula von der Leyen-i Trump den majurutepdang, Europe-i Russia nem sanctions tali agütsüta aser tariffs tali meshitsü aser bloc ajanga Russian energy aliba ano ajemtsü, ta shia liasü.

"Tanü senden ajanga Ukraine nung yimjung asoshi tajangzüke kecha mali. Iba ya ano 'market of hypocrisy' nung taaktsü mapang ka dang asütsü," ta Russia indang deputy ambassador to the UN, Dmitry Polyanskiy-i ashi.

"United States indang tiri Ukraine tashi nung tamang akaba ni pela agizüker," ta France Tir Emmanuel Macron-i ashi.

Taoba hopta temelaba makai Russian fighter jets asen tashi Estonia indang airspace telungi aitba dak sendakba nung NATO allies tem senden ka amentsü lir.

Temelaba makai Russia nunger tayimtsü aitba khazüka yokba NATO linüktem den ni adentsü, ta Trump-i ashi saka US indang-indanga iba rara nung adentsübo tensa dak keta lir ta shia liasü.

BILEMDANGANG

"Kanga pelaba mapang, shinga danga kecha tenangzüke aser kanga jashiba mapang, shinga dangia shiti tezülü."